

## Untuk Siaran Segera

### **Majlis Getah Malaysia Menerajui Pemacuan Kemampanan dalam Industri Getah**

**KUALA LUMPUR, 18 JANUARI 2024** – Majlis Getah Malaysia (MRC) komited terhadap visinya untuk menjadikan Malaysia pengeksport utama produk getah yang dihasilkan secara mampan. Dengan tumpuan kepada kualiti dan kemampanan, MRC menggalakkan amalan perniagaan yang bertanggungjawab melalui inisiatif alam sekitar, sosial dan tadbir urus (ESG) sambil membina hubungan yang kukuh dengan pihak berkepentingan.

Sehingga 2022, Malaysia menduduki tempat kelapan di peringkat global dalam pengeluaran getah. Pada tahun lalu, negara memperoleh RM27.16 bilion daripada eksport getah, dengan 70% (RM19.04 bilion) datang daripada sarung tangan getah. Barangan getah Malaysia dieksport ke 190 buah negara, dengan Amerika Syarikat (29%) dan Kesatuan Eropah (19%) sebagai dua destinasi eksport utama.

Dengan jumlah pengguna yang kini semakin ramai menuntut produk yang mampan dari segi alam sekitar dan etika, ianya membawa kepada permintaan global yang semakin kukuh untuk kemampanan terus berkembang. Industri digesa untuk mengurangkan impak terhadap alam sekitar, menegakkan etika dan menjalankan perniagaan tanpa memberi kesan negatif kepada keseimbangan alam sekitar, komuniti atau masyarakat secara menyeluruh. Sebagai penyumbang penting kepada ekonomi Malaysia, penggunaan amalan kemampanan akan menjadi langkah penting bagi industri getah untuk terus maju ke hadapan.

Mengakui keperluan untuk perubahan ini, MRC telah mengadakan Persidangan Getah ESG 2024 buat julung kalinya yang berlangsung dari 17 hingga 18 Januari 2024 di Aloft, Kuala Lumpur dengan menjemput pihak berkepentingan industri, pakar-pakar dan para pemimpin untuk mengambil bahagian dalam acara ini yang bertujuan untuk mempromosikan, menggalakkan dan menyokong penerimaan dan penggunaan amalan kemampanan dalam industri getah.

Slogan, "Menavigasi ESG untuk Masa Depan Berdaya Tahan Industri Getah Malaysia," merangkumi fokus persidangan tersebut. Ia bertujuan untuk meneroka bagaimana pemain dan pihak berkepentingan industri getah boleh mengharmonikan usaha kemampanan dengan aspek ESG, pematuhan sosial dan amalan berdaya tahan. Objektifnya adalah untuk memastikan kejayaan jangka panjang sambil mewujudkan impak positif kepada masyarakat dan alam sekitar.

"Dalam mengejar kelestarian alam sekitar dalam industri getah kita, adalah penting untuk mengutamakan amalan mesra alam," kata YBhg. Dato' Sri Mohamad Suparadi, Pengerusi MRC. "Ini melibatkan pelaburan dalam penyelidikan untuk alternatif yang lebih hijau, melaksanakan strategi untuk meminimumkan sisa serta menjimatkan tenaga dan jika boleh, menukarnya menjadi produk sampingan yang lain."

Acara itu turut menampilkan empat penceramah terkemuka daripada Pertubuhan Bangsa-Bangsa Bersatu, Delegasi EU, Kementerian Pelaburan, Perdagangan dan Industri (MITI) dan Pertubuhan Buruh Antarabangsa (ILO) bagi mengetuai perbincangan mengenai kemajuan Matlamat Pembangunan Kelestarian (SDG), rangka kerja ESG untuk industri, peraturan kemampanan dan pematuhan sosial serta kebimbangan terhadap alam sekitar dalam sektor getah yang kian meningkat. Di samping pembentangan ucapnama, perbincangan panel dan sesi meja bulat turut diadakan untuk memupuk penglibatan dan wacana yang bermakna dalam kalangan peserta.

Timbalan Ketua Setiausaha (Perladangan & Komoditi) Kementerian Perladangan dan Komoditi (KPK), YBhg. Dato' Zailani bin Haji Hashim turut menghadiri acara tersebut dan menyertai perbincangan panel bertajuk Memahami Inisiatif Dasar Malaysia untuk Industri Getah dalam Sektor ESG (*Understanding Malaysia's Policy Initiatives for the Rubber Industry in the ESG Areas*).

"Menjaga alam sekitar dan bertanggungjawab secara sosial bukan sekadar sesuatu yang baik untuk dilakukan; ia adalah sesuatu yang perlu kita laksanakan bagi menjamin masa hadapan industri getah untuk berkembang maju", kata Encik Muhammad Eizaaz bin Muhammad Redzuan, Ketua Pegawai Eksekutif MRC.

Pertukaran MoU antara MRC dan Universiti Malaya turut diadakan semasa acara tersebut berlangsung, diikuti dengan satu lagi pertukaran MoU antara MRC dan MARDEC Berhad.

Persidangan Getah ESG 2024 ini diakhiri dengan perbincangan meja bulat yang menyatukan ahli industri dan pihak berkepentingan, yang diadakan dengan kerjasama Pertubuhan Buruh Antarabangsa (ILO). Para peserta secara aktif meneroka strategi untuk meningkatkan kemampanan dalam industri getah yang menekankan penubuhan mekanisme pemantauan sendiri. Dalam sesi penutupan, Encik Daniel Rees, Pengarah Program Tindakan Keutamaan ILO Bagi Rantaian Bekalan, merumuskan dedikasi kolektif dan visi bersama untuk menjamin masa hadapan yang lebih mampan dalam industri getah. Beliau mengakui betapa pentingnya pemantauan yang berterusan dan sikap akauntabiliti untuk mengemudi persekitaran kawal selia yang semakin berkembang, sambil mempromosikan amalan perniagaan yang mampan kepada para pemain industri dan pihak berkepentingan.

[TAMAT]